

ложиша. Доколѣ убо имамаы благополучное время, доколѣ отиѣкуди инуди языческое вѣстаніе не смущает нас, найдем и мы и нападѣмъ на христіяноубійць града Казани, не истеряем дѣланій время в неплодных (л. 80) дѣяніи. Аще бо ожидаем послов<sup>1</sup> из Литвы, никто же нам запинатель будетъ воюющимъ тамо, аще же и не чаемъ, и тако нужда ест нам поспѣшити дѣло, донележе из Литвы не стужаемся. Скверной бо Казани от срѣд быв'шѣ, удоб намъ противу прочихъ стояти, грознымъ оттуду бывшимъ. Немощно мужемъ спящимъ и возлежащимъ побѣды въздвигнути. Подвигомъ время ест, а не прохлажденій, исгощанія сребра время, а не пощаждѣніа. Глаголаша бо и нѣкии отъ виѣшнихъ философъ къ единому царю: «Сребрянными копіи ратуѣ, и вся победиши». Въскрилимы нашихъ многихъ и добрыхъ сущихъ царскими дарованіи и изыостримъ ихъ благыми словесы и подвижателными и каковыми великій въ царѣхъ Ираклій, на Персыду устремився, изыострилъ естъ своихъ. Дивный, дивный бо сей царь, новополучивъ царство но разореніи Фоки мучителя, и сі(е) емъ обрѣтъ вел'ми озлоблено и изнемогше въ всѣхъ, безчислена зла по вся дни страдаше единнадесять лѣтъ отъ хагана авар'скаго начальника и Хоз'дроя, перьскаго царя, при немъ же персяни взяша и под собою подложиша весь Египетъ и Палестину и Александрію и Лівію до Ефіоплян. Разумѣв'же Ираклій царь, яко ничто же успѣетъ дары насыпляя царя Хозроя, но наипаче и множае на себе его раз(з)вѣряетъ, божественную ревность (л. 80 об.) въспрїимъ, преведе европійское воинство въ Асію, примирив'шися прежде съ хаганомъ, во второе же на десятъ лѣтъ царствіа своего противу (Пе)рсиды устремися, вѣры подавъ людемъ своимъ, яко съ ними и до смерти подвижется и яко чада своа тѣхъ побережетъ. «Хотяше бо, рече лѣтописецъ, власть имѣти не століко страхомъ, сколико любовію». И вел'ми тѣхъ словесы подвижателными на брани въздвигъ, повелѣваше имъ отъ неправды убо огребатися, благочестіа же дрѣжатися. Прилагаше же и сіа, глаголя имъ часто: «Множество, братіа, враговъ да не смущаетъ вы: богу бо хотящу, единъ поженетъ тысуца. Пожремъ убо себе о нашихъ братіи спасеніи, прїимъ вѣн'ци мученическыя. Даже и будущее время похвалитъ насъ сицевыми мудрованіи и словесы доблественными». Дивный сей царь, воинство свое подвизаа и сійъ вкупѣ съ ними ратуя и подвизаяся до язвы, божіимъ споспѣшьствомъ в' шести лѣтахъ Хозровое мучительство разори и под собою покори і Египетъ и Палестину и Лівію до Ефіопіи пакы восъпрїятъ. Како убо неправедно и намъ того подражати и ревность божественную въспрїяти Христа ради и спасеніи братіи нашихъ, и разорити убо безбожныхъ скифъ сън'мища, яко же онъ перскаго почитанія,

<sup>1</sup> *Испр., в рукоп.: послав.*